

8. maj 2019

UPA 2019/43

Meeqqat atuarianni atuartut akornganni pimmatiginnittarneq pinaveersaartinniarlugu periusissiamik kingusinnerpaamik UPA2020-mi saqqummiunneqartussamik Naalakkersuisut peqquneqarnissaannik Inatsisartut aaliangiiffigisassaattut siunnersuut. Periusissiap atuutsinneqalernissaanut suliniutit assigiinngitsut qaqugukkut aallarnisarnissaanut piffissalersuut ilanngunneqassaaq.
(Inatsisartunut ilaasorta, Aqqa Samuelson, Inuit Ataqatigiit).

Inatsisartuni Inuit Ataqatigiit sinnerlugit ilaasortap Aqqa Samuelson siunnersuutaa Siumumiik imaattumik oqaaseqarfigissuarput.

Siumumiittaaq uagut pimmatiginnittarnerup akiortuarnissaa pingaartutut isigaarput. Meeqqat inersimasunik tusaasatik isigisatillu ingerlateqqittarpaat taamaattumik inersimasutut meeqqanut maligassiunissaq tamatta pisussaaffigaarput.

Pimmatiginninneq sumi tamani akiugassaavoq soorlu meeqqerivinni, atuarfinni, ilinniarfinni, suliffeqarfinni, nittartakkani sumilu tamaani pimmatiginnittarneq tassaammat inummut timikkut tarnikkullu annertuumik eqquisartoq.

Inuiaqatigiit akornatsinniittoqarpoq meeraanermi pimmatigineqartarsimanerup kingunerisaanik suli annertuumik kamasaqartut imal. erloqissuteqartut, imminnut nikangilersimasut allatulluunniit kingunerlutsisimasut.

Pimmatiginnittarneq akiorniarlugu annertuumik meeqqanut angajoqqaanullu paasisitsiniaaneq ingerlanneqartuartaqarpoq soorlu nittartakkatigut ataatsimiisitsisarnikkullu. Ass. iluaqutaasaqaaq meeqqerivinni kammagiinnissaq sammineqaraangat aammalu atuarfinni ilinniartitsisut pimmatiginnittarneq pillugu paasisitsiniaagaangata angajoqqaanik ataatsimiisitsisarnerit aqqutigalugit. Assersuutitut taaneqarsinnaavoq Kamma Bamsi, meeqqerivimmiit atuarfimiillu angerlarsimaffimmut angerlaanneqartartoq.

Siumumi isumaqarpugut pimmatiginnittarneq akiorniarlugu uagut angajoqqaatut qanoq meeqqatsinnut qaammarsaassutigisinnaaneripput. Ass. meeraq atuaqatiminit pimmatigineqarpat eqqaaniittullu nipangersimaannarpata qisuariatillu pimmatigineqataanertut nalilerneqarsinnaammat pimmatiginnittorlu misigissutsitigut nukittorsaannarlugu. Taamaammat pimmatiginnittarneq akiussagutsigu pingaaruteqarpoq meerartagut paasitissallugit pimmatiginnittoq ilalersornagu ajorinnillutik akuleruttarnissaat pisariaqartoq aatsaat taamaaliornikkut pimmatiginnittartoq sanngiilitinneqarsinnaammat.

Atuarfinni ajorluinnartumik pisoqartillugu angajoqqaatigiit akornanni torersumik akuleruttarneq iluaqutaasarpoq ilaannimi pimmatiginnittarneq ima ajoqutaalersinnaatigisarpoq ilinniartitsisumut nukippassuarnik tingooqqaasarluni nukillaariartortitsisarlungu piffissaq inerterinerujussuarmut atorneqaleraangat.

Pimmatiginnittarneq akiorniarlugu kommuunit tamarmik ullumikkut politikkeqartariaqaraluarput, ass. pimmatiginnittoqarsimappat iliuusissat suuppat? Kikkut qanoq qisuariassappat? Taamaattumik politikkeqarneq assut iluaqutaasarpog tassami malitassaqarani angajoqqaat akunneranni silaannaq pitsaanngitsorujussuaq pilersinneqarsinnaasarmat taamaammallu ass. meeqqerivinni paarsisut ilinniartitsisullu akuutinneqartarnissaat pingaarutilerujussuuvog.

Assersuuteqalaassuunga nukarlequterput meeqqerivimmiittartoq Kamma Bambi angerlaattarnikuuaa, kammagiinnerup isumaa sammillug, pitsaasumik iliorneq il. il. aammattaaq atuartuutigut angajullit angajoqqaallu atuarfimmi ataatsimeeqatigiittarnikuuvugut qingasaarisarneq pimmatiginnittarnerlu assigiinngissutaat sammillugit, aammalu pimmatiginnittoqartillug iliuusissat atuartut akornanni, ilinniartitsisut angajoqqaallu akornanni. Ataatsimiisitsinerit taamaattut iluaqutaasarpug ukiullu tamaasa pisariaqaraluarlutik.

Kommuunit pimmatiginnittarneq akiorniarlugu politikkeqartanninnerat tunngavigalug atuarfippassuit ullumikkut malitassaqanngillat, taamaammallu Naalakkersuisut allannguutissatut siunnersuutaat Siumumiik akuersaarparput tassalu meeqqanut sulit atualinngitsunut, meeqqat atuarfuanni inuusuttullu ilinniarsiini pimmatiginnittarnerup pinaveersaartinnissaa pillug nuna tamakkerlug UKA2020 –mut periusissiortoqarnissasoq piffissalersorneqarsimasumik.

Siumumiik taamatut oqaaseqarluta siunnersuut ataatsimiititaliamut susassaqartumut ingerlateqqipparput.

Doris J. Jensen, Siumut